



# 中青诗联网



## 活动中心



二〇二二年 十月 廿四日

# 古诗十九首与乐府诗选

## 目 录

序言 .....	1
▶ 古诗十九首（简体） .....	2
◎行行重行行 .....	2
◎青青河畔草 .....	2
◎青青陵上柏 .....	2
◎今日良宴会 .....	2
◎西北有高樓 .....	2
◎涉江采芙蓉 .....	2
◎明月皎夜光 .....	2
◎冉冉孤生竹 .....	2
◎庭中有奇树 .....	2
◎迢迢牵牛星 .....	3
◎回车驾言迈 .....	3
◎东城高且长 .....	3
◎驱车上东门 .....	3
◎去者日以疏 .....	3
◎生年不满百 .....	3
◎凛凛岁云暮 .....	3
◎孟冬寒气至 .....	3
◎客从远方来 .....	3
◎明月何皎皎 .....	3
▶ 古诗十九首（繁体） .....	4
◎行行重行行 .....	4
◎青青河畔草 .....	4
◎青青陵上柏 .....	4
◎今日良宴會 .....	4
◎西北有高樓 .....	4
◎涉江採芙蓉 .....	4
◎明月皎夜光 .....	4
◎冉冉孤生竹 .....	4
◎庭中有奇樹 .....	4
◎迢迢牽牛星 .....	5
◎回車駕言邁 .....	5
◎東城高且長 .....	5
◎驅車上東門 .....	5
◎去者日以疏 .....	5
◎生年不滿百 .....	5
◎凜凜歲雲暮 .....	5
◎孟冬寒氣至 .....	5
◎客從遠方來 .....	5

◎明月何皎皎 .....	6
▶ 其他古诗 .....	7
◎上山采蘼芜 .....	7
◎橘柚垂华实 .....	7
◎兰若生春阳 .....	7
◎步出城东门 .....	7
◎穆穆清风至 .....	7
◎四坐且莫喧 .....	7
◎新树兰蕙葩 .....	7
◎古八变歌（北风初秋至） .....	7
▶ 旧题苏李诗 .....	8
◎黄鹄一远别（旧题苏武诗） .....	8
◎结发为夫妻（旧题苏武诗） .....	8
◎烛烛晨明月（旧题苏武诗） .....	8
◎童童孤生柳（旧题苏武诗） .....	8
◎良时不再至（旧题李陵诗） .....	8
◎嘉会难再遇（旧题李陵诗） .....	8
◎携手上河梁（旧题李陵诗） .....	8
◎有鸟西南飞（旧题李陵诗） .....	8
◎烁烁三星列（旧题李陵诗） .....	9
◎晨风鸣北林（旧题李陵诗） .....	9
▶ 汉乐府 .....	10
◎战城南 .....	10
◎有所思 .....	10
◎上邪 .....	10
◎鸡鸣 .....	10
◎平陵东 .....	10
◎陌上桑 .....	10
◎长歌行 .....	10
◎陇西行 .....	10
◎东门行 .....	11
◎饮马长城窟行 .....	11
◎妇病行 .....	11
◎孤儿行 .....	11
◎艳歌何尝行 .....	11
◎艳歌行（南山石嵬嵬） .....	11
◎梁甫吟 .....	12
◎伤歌行 .....	12
◎白头吟 .....	12
◎怨歌行 .....	12
◎悲歌 .....	12
◎古歌 .....	12
◎刺巴郡守诗 .....	12
◎后汉桓灵时谣 .....	12

◎羽林郎 .....	12
◎董娇饶 .....	13
◎古八变歌 .....	13
◎并州歌 .....	13
◎巴东三峡歌 .....	13
◎日出入 .....	13
◎薤露 .....	13
◎篙里 .....	13
◎乌生 .....	13
◎上陵 .....	13
◎善哉行 .....	13
◎怨诗行 .....	14
▶ 南朝乐府 .....	15
◎子夜歌其三 .....	15
◎子夜歌其七 .....	15
◎子夜歌其九 .....	15
◎子夜歌其十三 .....	15
◎子夜歌其十八 .....	15
◎子夜歌其廿四 .....	15
◎子夜歌其廿八 .....	15
◎子夜歌其卅三 .....	15
◎子夜歌其卅五 .....	15
◎子夜歌其卅六 .....	15
◎子夜四时歌·春歌 其三 .....	15
◎子夜四时歌·春歌 其五 .....	15
◎子夜四时歌·春歌 其六 .....	15
◎子夜四时歌·春歌 其十 .....	15
◎子夜四时歌·夏歌 其一 .....	16
◎子夜四时歌·夏歌 其七 .....	16
◎子夜四时歌·夏歌 其八 .....	16
◎子夜四时歌·秋歌 其十六 .....	16
◎子夜四时歌·秋歌 其十九 .....	16
◎子夜四时歌·冬歌 其一 .....	16
◎子夜四时歌·冬歌 其十七 .....	16
◎团扇郎歌其二 .....	16
◎上声歌其六 .....	16
◎丁督户歌其四 .....	16
◎丁督户歌其五 .....	16
◎懊侬歌其三 .....	16
◎懊侬歌其十 .....	16
◎华山畿 .....	16
◎读曲歌其十六 .....	16
◎读曲歌其廿一 .....	17
◎读曲歌其廿九 .....	17

◎神弦歌·其六 青溪小姑曲 .....	17
◎青溪小姑歌其一 .....	17
◎石城乐 .....	17
◎乌夜啼其四 .....	17
◎莫愁乐其二 .....	17
◎三洲歌其一 .....	17
◎作蚕丝其二 .....	17
◎杨叛儿 .....	17
◎长干曲 .....	17
◎巴东三峡歌 .....	17
◎三峡谣 .....	17
◎西洲曲 .....	17
◎东飞伯劳歌 .....	18
◎苏小小歌 .....	18
▶ 北朝乐府 .....	19
◎琅琊王歌辞其一 .....	19
◎紫骝马歌辞其二 .....	19
◎紫骝马歌辞其三 .....	19
◎折杨柳歌辞其一 .....	19
◎折杨柳歌辞其二 .....	19
◎折杨柳歌辞其四 .....	19
◎折杨柳歌辞其五 .....	19
◎陇头歌辞其一 .....	19
◎陇头歌辞其三 .....	19
◎李波小妹歌 .....	19
◎敕勒歌 .....	19
▶ 其他乐府诗 .....	19
◎丁令威歌 .....	19
◎南风谣 .....	19
◎隋炀帝时挽舟者歌 .....	20

## 序 言

问座下痛哭流涕者谁。

陈之微

2022 年 10 月 22 日

## ► 古诗十九首（简体）

### ◎行行重行行

行行重行行，与君生别离。相去万余里，各在天一涯。道路阻且长，会面安可知。胡马依北风，越鸟巢南枝。相去日已远，衣带日已缓。浮云蔽白日，游子不顾反。思君令人老，岁月忽已晚。弃捐勿复道，努力加餐饭。

### ◎青青河畔草

青青河畔草，郁郁园中柳。盈盈楼上女，皎皎当窗牖。娥娥红粉妆，纤纤出素手。昔为倡家女，今为荡子妇。荡子行不归，空床难独守。

### ◎青青陵上柏

青青陵上柏，磊磊涧中石。人生天地间，忽如远行客。斗酒相娱乐，聊厚不为薄。驱车策驽马，游戏宛与洛。洛中何郁郁，冠带自相索。长衢罗夹巷，王侯多第宅。两宫遥相望，双阙百余尺。极宴娱心意，戚戚何所迫。

### ◎今日良宴会

今日良宴会，欢乐难具陈。弹箏奋逸响，新声妙入神。令德唱高言，识曲听其真。齐心同所愿，含意俱未申。人生寄一世，奄忽若飘尘。何不策高足，先据要路津。无为守穷贱，轲轲长苦辛。

### ◎西北有高楼

西北有高楼，上与浮云齐。交疏结绮窗，阿阁三重阶。上有弦歌声，音响一何悲。谁能为此曲，无乃杞梁妻。清商随风发，中曲正徘徊。一弹再三叹，慷慨有余哀。不惜歌者苦，但伤知音稀。愿为双鸿鹄，奋翅起高飞。

### ◎涉江采芙蓉

涉江采芙蓉，兰泽多芳草。采之欲遗谁，所思在远道。还顾望旧乡，长路漫浩浩。同心而离居，忧伤以终老。

### ◎明月皎夜光

明月皎夜光，促织鸣东壁。玉衡指孟冬，众星何历历。白露沾野草，时节忽复易。秋蝉鸣树间，玄鸟逝安适。昔我同门友，高举振六翮。不念携手好，弃我如遗迹。南箕北有斗，牵牛不负轭。良无磐石固，虚名复何益。

### ◎冉冉孤生竹

冉冉孤生竹，结根泰山阿。与君为新婚，菟丝附女萝。菟丝生有时，夫妇会有宜。千里远结婚，悠悠隔山陂。思君令人老，轩车来何迟。伤彼蕙兰花，含英扬光辉。过时而不采，将随秋草萎。君亮执高节，贱妾亦何为。

### ◎庭中有奇树

庭中有奇树，绿叶发华滋。攀条折其荣，将以遗所思。馨香盈怀袖，路远莫致之。此物何足贵，但感别经时。

◎迢迢牵牛星

迢迢牵牛星，皎皎河汉女。纤纤擢素手，札札弄机杼。终日不成章，泣涕零如雨。河汉清且浅，相去复几许。盈盈一水间，脉脉不得语。

◎回车驾言迈

回车驾言迈，悠悠涉长道。四顾何茫茫，东风摇百草。所遇无故物，焉得不速老。盛衰各有时，立身苦不早。人生非金石，岂能长寿考。奄忽随物化，荣名以为宝。

◎东城高且长

东城高且长，逶迤自相属。回风动地起，秋草萋已绿。四时更变化，岁暮一何速。晨风怀苦心，蟋蟀伤局促。荡涤放情志，何为自结束。燕赵多佳人，美者颜如玉。被服罗裳衣，当户理清曲。音响一何悲，弦急知柱促。驰情整巾带，沉吟聊踟躅。思为双飞燕，衔泥巢君屋。

◎驱车上东门

驱车上东门，遥望郭北墓。白杨何萧萧，松柏夹广路。下有陈死人，杳杳即长暮。潜寐黄泉下，千载永不寤。浩浩阴阳移，年命如朝露。人生忽如寄，寿无金石固。万岁更相送，贤圣莫能度。服食求神仙，多为药所误。不如饮美酒，被服纨与素。

◎去者日以疏

去者日以疏，生者日已亲。出郭门直视，但见丘与坟。古墓犁为田，松柏摧为薪。白杨多悲风，萧萧愁杀人。思还故里闾，欲归道无因。

◎生年不满百

生年不满百，常怀千岁忧。昼短苦夜长，何不秉烛游。为乐当及时，何能待来兹。愚者爱惜费，但为后世嗤。仙人王子乔，难可与等期。

◎凛凛岁云暮

凛凛岁云暮，蟋蟀夕鸣悲。凉风率已厉，游子寒无衣。锦衾遗洛浦，同袍与我违。独宿累长夜，梦想见容辉。良人惟古欢，枉驾惠前绥。愿得常巧笑，携手同车归。既来不须臾，又不处重闱。亮无晨风翼，焉能凌风飞。眄睐以适意，引领遥相希。徙倚怀感伤，垂涕沾双扉。

◎孟冬寒气至

孟冬寒气至，北风何惨栗。愁多知夜长，仰观众星列。三五明月满，四五詹兔缺。客从远方来，遗我一书札。上言长相思，下言久离别。置书怀袖中，三岁字不灭。一心抱区区，惧君不识察。

◎客从远方来

客从远方来，遗我一端绮。相去万余里，故人心尚尔。文彩双鸳鸯，裁为合欢被。著以长相思，缘以结不解。以胶投漆中，谁能别离此。

◎明月何皎皎



明月何皎皎，照我羅床緯。忧愁不能寐，攬衣起徘徊。客行雖云樂，不如早旋歸。出戶獨彷徨，愁思當告誰。引領還入房，淚下沾裳衣。

## ► 古詩十九首（繁體）

### ◎行行重行行

行行重行行，與君生別離。相去萬余裏，各在天一涯。道路阻且長，會面安可知。胡馬依北風，越鳥巢南枝。相去日已遠，衣帶日已緩。浮雲蔽白日，遊子不顧反。思君令人老，歲月忽已晚。棄捐勿復道，努力加餐飯。

### ◎青青河畔草

青青河畔草，鬱鬱園中柳。盈盈樓上女，皎皎當窗牖。娥娥紅粉妝，纖纖出素手。昔為倡家女，今為蕩子婦。蕩子行不歸，空床難獨守。

### ◎青青陵上柏

青青陵上柏，磊磊澗中石。人生天地間，忽如遠行客。斗酒相娛樂，聊厚不為薄。驅車策駑馬，遊戲宛與洛。洛中何鬱鬱，冠帶自相索。長衢羅夾巷，王侯多第宅。兩宮遙相望，雙闕百餘尺。極宴娛心意，感感何所迫。

### ◎今日良宴會

今日良宴會，歡樂難具陳。彈箏奮逸響，新聲妙入神。令德唱高言，識曲聽其真。齊心同所願，含意俱未申。人生寄一世，奄忽若飄塵。何不策高足，先據要路津。無為守窮賤，輾轉長苦辛。

### ◎西北有高樓

西北有高樓，上與浮雲齊。交疏結綺窗，阿閣三重階。上有絃歌聲，音響一何悲。誰能為此曲，無乃杞梁妻。清商隨風發，中曲正徘徊。一彈再三嘆，慷慨有餘哀。不惜歌者苦，但傷知音稀。願為雙鴻鵠，奮翅起高飛。

### ◎涉江採芙蓉

涉江採芙蓉，蘭澤多芳草。採之慾遺誰，所思在遠道。還顧望舊鄉，長路漫浩浩。同心而離居，憂傷以終老。

### ◎明月皎夜光

明月皎夜光，促織鳴東壁。玉衡指孟冬，眾星何歷歷。白露沾野草，時節忽復易。秋蟬鳴樹間，玄鳥逝安適。昔我同門友，高舉振六翮。不念攜手好，棄我如遺蹟。南箕北有鬥，牽牛不負軛。良無磐石固，虛名復何益。

### ◎冉冉孤生竹

冉冉孤生竹，結根泰山阿。與君為新婚，菟絲附女蘿。菟絲生有時，夫婦會有宜。千里遠結婚，悠悠隔山陂。思君令人老，軒車來何遲。傷彼蕙蘭花，含英揚光輝。過時而不採，將隨秋草萎。君亮執高節，賤妾亦何為。

### ◎庭中有奇樹

庭中有奇樹，綠葉發華滋。攀條折其榮，將以遺所思。馨香盈懷袖，路遠莫致之。此物何足貴，但感別經時。

#### ◎迢迢牽牛星

迢迢牽牛星，皎皎河漢女。纖纖擢素手，札札弄機杼。終日不成章，泣涕零如雨。河漢清且淺，相去復幾許。盈盈一水間，脈脈不得語。

#### ◎回車駕言邁

迴車駕言邁，悠悠涉長道。四顧何茫茫，東風搖百草。所遇無故物，焉得不速老。盛衰各有時，立身苦不早。人生非金石，豈能長壽考。奄忽隨物化，榮名以為寶。

#### ◎東城高且長

東城高且長，逶迤自相屬。迴風動地起，秋草萋已綠。四時更變化，歲暮一何速。晨風懷苦心，蟋蟀傷徬促。蕩滌放情志，何為自結束。燕趙多佳人，美者顏如玉。被服羅裳衣，當戶理清曲。音響一何悲，弦急知柱促。馳情整巾帶，沈吟聊躑躅。思為雙飛燕，銜泥巢君屋。

#### ◎驅車上東門

驅車上東門，遙望郭北墓。白楊何蕭蕭，松柏夾廣路。下有陳死人，杳杳即長暮。潛寐黃泉下，千載永不寤。浩浩陰陽移，年命如朝露。人生忽如寄，壽無金石固。萬歲更相送，賢聖莫能度。服食求神仙，多為藥所誤。不如飲美酒，被服紵與素。

#### ◎去者日以疏

去者日以疏，來者日以親。出郭門直視，但見丘與墳。古墓犁為田，松柏摧為薪。白楊多悲風，蕭蕭愁殺人。思還故里閭，欲歸道無因。

#### ◎生年不滿百

生年不滿百，常懷千歲憂。晝短苦夜長，何不秉燭遊。為樂當及時，何能待來茲。愚者愛惜費，但為後世嗤。仙人王子喬，難可與等期。

#### ◎凜凜歲雲暮

凜凜歲雲暮，蟋蟀夕鳴悲。涼風率已厲，遊子寒無衣。錦衾遺洛浦，同袍與我違。獨宿累長夜，夢想見容輝。良人惟古歡，枉駕惠前綏。願得常巧笑，攜手同車歸。既來不須臾，又不處重闈。亮無晨風翼，焉能凌風飛。眄眄以適意，引領遙相睎。徙倚懷感傷，垂涕沾雙扉。

#### ◎孟冬寒氣至

孟冬寒氣至，北風何慘慄。愁多知夜長，仰觀眾星列。三五明月滿，四五詹兔缺。客從遠方來，遺我一書札。上言長相思，下言久離別。置書懷袖中，三歲字不滅。一心抱區區，懼君不識察。

#### ◎客從遠方來

客從遠方來，遺我一端綺。相去萬餘里，故人心尚爾。文彩雙鴛鴦，裁為合歡被。著以長相思，緣以結不解。以膠投漆中，誰能別離此。

◎明月何皎皎

明月何皎皎，照我羅床緯。憂愁不能寐，攬衣起徘徊。客行雖雲樂，不如早旋歸。出戶獨彷徨，愁思當告誰。引領還入房，淚下沾裳衣。

## ► 其他古诗

### ◎上山采蘼芜

上山采蘼芜，下山逢故夫。长跪问故夫，新人复何如？新人虽言好，未若故人姝。颜色类相似，手爪不相如。新人从门入，故人从閤去。新人工织缣，故人工织素。织缣日一匹，织素五丈余。将缣来比素，新人不如故。

### ◎橘柚垂华实

橘柚垂华实，乃在深山侧。闻君好我甘，窃独自雕饰。委身玉盘中，历年冀见食。芳菲不相投，青黄忽改色。人倘欲我知，因君为羽翼。

### ◎兰若生春阳

兰若生春阳，涉冬犹盛滋。愿言追昔爱，情款感四时。美人在云端，天路隔无期。夜光照玄阴，长叹恋所思。谁谓我无忧，积念发狂痴。

### ◎步出城东门

步出城东门，遥望江南路。前日风雪中，故人从此去。我欲渡河水，河水深无梁。愿为双黄鹄，高飞还故乡。

### ◎穆穆清风至

穆穆清风至，吹我罗衣裾。青袍似春草，草长条风舒。朝登津梁山，褰裳望所思。安得抱柱信，皎日以为期。

### ◎四坐且莫喧

四坐且莫喧，愿听歌一言。请说铜炉器，崔嵬象南山。上枝似松柏，下根据铜盘。雕文各异类，离娄自相联。谁能为此器，公输与鲁班。朱火然其中，青烟扬其间。从风入君怀，四坐莫不叹。香风难久居，空令蕙草残。

### ◎新树兰蕙葩

新树兰蕙葩，杂用杜蘅草。终朝采其华，日暮不盈抱。采之欲遗谁？所思在远道。馨香易销歇，繁华会枯槁。怅望何所言，临风送怀抱。

### ◎古八变歌（北风初秋至）

北风初秋至，吹我章华台。浮云多暮色，似从崦嵫来。枯桑鸣中林，络纬响空阶。翩翩飞蓬征，怆怆游子怀。故乡不可见，长望从此回。

## ► 旧题苏李诗

### ◎骨肉缘枝叶（旧题苏武诗）

骨肉缘枝叶，结交亦相因。四海皆兄弟，谁为行路人。况我连枝树，与子同一身。昔为鸳和鸯，今为参与辰。昔者常相近，邈若胡与秦。惟念当离别，恩情日以新。鹿鸣思野草，可以喻嘉宾。我有一樽酒，欲以赠远人。愿子留斟酌，叙此平生亲。

### ◎黄鹄一远别（旧题苏武诗）

黄鹄一远别，千里顾徘徊。胡马失其群，思心常依依。何况双飞龙，羽翼临当乖。幸有弦歌曲，可以喻中怀。请为游子吟，泠泠一何悲。丝竹厉清声，慷慨有余哀。长歌正激烈，中心怆以摧。欲展清商曲，念子不能归。俯仰内伤心，泪下不可挥。愿为双黄鹄，送子俱远飞。

### ◎结发为夫妻（旧题苏武诗）

结发为夫妻，恩爱两不疑。欢娱在今夕，燕婉及良时。征夫怀往路，起视夜何其。参辰皆已没，去去从此辞。行役在战场，相见未有期。握手一长叹，泪为生别滋。努力爱春华，莫忘欢乐时。生当复来归，死当长相思。

### ◎烛烛晨明月（旧题苏武诗）

烛烛晨明月，馥馥秋兰芳。芬馨良夜发，随风闻我堂。征夫怀远路，游子恋故乡。寒冬十二月，晨起践严霜。俯观江汉流，仰视浮云翔。良友远别离，各在天一方。山海隔中州，相去悠且长。嘉会难再遇，欢乐殊未央。愿君崇令德，随时爱景光。

### ◎童童孤生柳（旧题苏武诗）

童童孤生柳，寄根河水泥。连翩游客子，于冬服凉衣。去家千余里，一身常渴饥。寒夜立清庭，仰瞻天汉湄。寒风吹我骨，严霜切我肌。忧心常惨戚，晨风为我悲。瑶光游何速，行愿去何迟。仰视云间星，忽若割长帷。低头还自怜，盛年行已衰。依依恋明世，怆怆难久怀。

### ◎良时不再至（旧题李陵诗）

良时不再至，离别在须臾。屏营衢路侧，执手野踟蹰。仰视浮云驰，奄忽互相逾。风波一失所，各在天一隅。长当从此别，且复立斯须。欲因晨风发，送子以贱躯。

### ◎嘉会难再遇（旧题李陵诗）

嘉会难再遇，三载为千秋。临河濯长缨，念子怅悠悠。远望悲风至，对酒不能酬。行人怀往路，何以慰我愁。独有盈觞酒，与子结绸缪。

### ◎携手上河梁（旧题李陵诗）

携手上河梁，游子暮何之。徘徊蹊路侧，恨恨不能辞。行人难久留，各言长相思。安知非日月，弦望自有时。努力崇明德，皓首以为期。

### ◎有鸟西南飞（旧题李陵诗）

有鸟西南飞，熠熠似苍鹰。朝发天北隅，暮闻日南陵。欲寄一言去，托之笺彩缯。因风附轻翼，以遗心蕴蒸。鸟辞路悠长，羽翼不能胜。意欲从鸟逝，弩马不可乘。

◎烁烁三星列（旧题李陵诗）

烁烁三星列，拳拳月初生。寒凉应节至，蟋蟀夜悲鸣。晨风动乔木，枝叶日夜零。游子暮思归，塞耳不能听。远望正萧条，百里无人声。豺狼鸣后园，虎豹步前庭。远处天一隅，苦困独零丁。亲人随风散，历历如流星。三萍离不结，思心独屏营。愿得萱草枝，以解饥渴情。

◎晨风鸣北林（旧题李陵诗）

晨风鸣北林，熠熠东南飞。愿言所相思，日暮不垂帷。明月照高楼，想见余光辉。玄鸟夜过庭，仿佛能复飞。褰裳路踟蹰，彷徨不能归。浮云日千里，安知我心悲。思得琼树枝，以解长渴饥。

## ► 汉乐府

### ◎战城南

战城南，死郭北，野死不葬乌可食。为我谓乌，且为客豪。野死谅不葬，腐肉安能去子逃。水深唧唧，蒲苇冥冥。枭骑战斗死，驽马徘徊鸣。梁筑室何以南何以北，禾黍不获君何食。愿为忠臣安可得。思子良臣，良臣诚可思。朝行出攻，暮不夜归。

### ◎有所思

有所思，乃在大海南。何用问遗君，双珠玳瑁簪。用玉绍缭之。闻君有他心，拉杂摧烧之。摧烧之，当风扬其灰。从今以往，勿复相思。相思与君绝。鸡鸣狗吠，兄嫂当知之。妃呼豨，秋风肃肃晨风飏，东方须臾高知之。

### ◎上邪

上邪，我欲与君相知，长命无绝衰。山无陵，江水为竭，冬雷震震夏雨雪，天地合。乃敢与君绝。

### ◎鸡鸣

鸡鸣高树颠，狗吠深宫中。荡子何所之，天下方太平。刑法非有贷，柔协正乱名。黄金为君门，璧玉为轩堂。上有双樽酒，作使邯郸倡。刘玉碧青臂，后出郭门王。舍后有方池，池中双鸳鸯。鸳鸯七十二，罗列自成行。鸣声何啾啾，闻我殿东厢。兄弟四五人，皆为侍中郎。五日一时来，观者满足傍。黄金络马头，颍颍何煌煌。桃生露井上，李树生桃傍。虫来啮桃根，李树代桃僵。树木身相代，兄弟还相忘。

### ◎平陵东

平陵东，松柏桐，不知何人劫义公。劫义公，在高堂下。交钱百万两走马。两走马。亦诚难，顾见追吏心中恻。心中恻，血出漉，归告我家卖黄犊。

### ◎陌上桑

日出东南隅，照我秦氏楼。秦氏有好女，自名为罗敷。罗敷喜蚕桑，采桑城南隅。青丝为笼系，桂枝为笼钩。头上倭堕髻，耳中明月珠。缃绮为下裙，紫绮为上襦。行者见罗敷，下担捋髭须。耕者忘其犁，锄者忘其锄。来归相怒怨，但坐观罗敷。使君从南来，五马立踟蹰。使君遣吏往，问是谁家妹。秦氏有好女，自名为罗敷。罗敷年几何，二十尚不足，十五颇有余。使君谢罗敷，宁可共载否。罗敷前致辞，使君一何愚。使君自有妇，罗敷已有夫。东方千余骑，夫婿居上头。何用识夫婿，白马从骊驹。青丝系马尾，黄金络马头。腰中鹿卢剑，可值千万余。十五府小吏，二十朝大夫。三十侍中郎，四十专城居。为人洁白皙，鬋鬋颇有须。盈盈公府步，冉冉府中趋。坐中数千人，皆言夫婿殊。

### ◎长歌行

青青园中葵，朝露待日晞。阳春布德泽，万物生光辉。常恐秋节至，焜黄华叶衰。百川东到海，何时复西归。少壮不努力，老大徒伤悲。

### ◎陇西行

邪径过空庐，好人常独居。卒得神仙道，上与天相扶。过谒王父母，乃在太山隅。离天四五里，道逢赤松俱。揽辔为我御，将吾天上游。天上何所有，历历种白榆。桂树夹道生，青龙对伏趺。凤凰鸣啾啾，一母将九雏。顾视世间人，为乐甚独殊。好妇出迎客，颜色正敷愉。伸腰再拜跪，问客平安不。请客北堂上，坐客毡氍毹。清白各异樽，酒上玉华疏。酌酒持与客，客言主人持。却略再拜跪，然后持一杯。谈笑未及竟，左顾敕中厨。促令办粗饭，慎莫使稽留。废礼送客出，盈盈府中趋。送客亦不远，足不过门枢。取妇得如此，齐姜亦不如。健妇持门户，亦胜一丈夫。

### ◎东门行

出东门，不顾归。来入门，怅欲悲。盎中无斗米储，还视架上无悬衣。拔剑东门去，舍中儿母牵衣啼。他家但愿富贵，贱妾与君共哺糜。上用仓浪天故，下当用此黄口儿。今非，咄，吾去为迟，白发时下难久居。

### ◎饮马长城窟行

青青河畔草，绵绵思远道。远道不可思，宿昔梦见之。梦见在我旁，忽觉在他乡。他乡各异县，展转不相见。枯桑知天风，海水知天寒。入门各自媚，谁肯相为言。客从远方来，遗我双鲤鱼。呼儿烹鲤鱼，中有尺素书。长跪读素书，书中竟何如。上言加餐饭，下言长相忆。

### ◎妇病行

妇病连年累岁，传呼丈人前一言。当言未及得言，不知泪下一何翩翩。属累君两三孤子，莫我儿饥且寒。有过慎莫笞笞，行当折摇，思复念之。乱曰抱时无衣，襦复无里。闭门塞牖，舍孤儿到市。道逢亲交，泣坐不能起。从乞求与孤买饵，对交啼泣，泪不可止。我欲不伤悲不能已。探怀中钱持授。交入门，见孤儿啼索其母抱。徘徊空舍中，行复尔耳，弃置勿复道。

### ◎孤儿行

孤儿生。孤子遇生。命独当苦。父母在时。乘坚车。驾驷马。父母已去。兄嫂令我行贾。南到九江。东到齐与鲁。腊月来归。不敢自言苦。头多虬虱。面目多尘。大兄言办饭。大嫂言视马。上高堂。行取殿下堂。孤儿泪下如雨。使我朝行汲。暮得水来归。手为错。足下无菲。怆怆履霜。中多蒺藜。拔断蒺藜肠肉中。怆欲悲。泪下漉漉。清涕累累。冬无复襦。夏无单衣。居生不乐。不如早去。下从地下黄泉。春气动。草萌芽。三月蚕桑。六月收瓜。将是瓜车。来到还家。瓜车反覆。助我者少。啖瓜者多。愿还我蒂。兄与嫂严。独且急归。当兴校计。乱曰：里中一何讻讻。愿欲寄尺书。将与地下父母。兄嫂难与久居

### ◎艳歌何尝行

飞来双白鹄，乃从西北来。十十五五，罗列成行。妻卒被病，行不能相随。五里一反顾，六里一徘徊。吾欲衔汝去，口噤不能开。吾欲负汝去，毛羽何摧颓。乐哉新相知，忧来生别离。踌躇顾群侣，泪下不自知。念与君离别，气结不能言。各各重自爱，远道归还难。妾当守空房，闭门下重关。若生当相见，亡者会黄泉。

### ◎艳歌行（南山石嵬嵬）



南山石嵬嵬。松柏何离离。上枝拂青云。中心十数围。洛阳发中梁。松树窃自悲。斧锯截是松。松树东西摧。特作四轮车。载至洛阳宫。观者莫不叹。问是何山材。谁能刻镂此。公输与鲁班。被之用丹漆。熏用苏合香。本自南山松。今为宫殿梁。

### ◎梁甫吟

步出齐城门，遥望荡阴里。里中有三坟，累累正相似。问是谁家墓，田疆古冶子。力能排南山，文能绝地纪。一朝被谗言，二桃杀三士。谁能为此谋，国相齐晏子。

### ◎伤歌行

昭昭素明月，辉光烛我床。忧人不能寐，耿耿夜何长。微风吹闺闼，罗帷自飘扬。揽衣曳长带，屣履下高堂。东西安所之？徘徊以彷徨。春鸟翻南飞，翩翩独翱翔。悲声命俦匹，哀鸣伤我肠。感物怀所思，泣涕忽沾裳。伫立吐高吟，舒愤诉穹苍。

### ◎白头吟

皑如山上雪，皎若云间月。闻君有两意，故来相决绝。今日斗酒会，明旦沟水头。躑躅御沟上，沟水东西流。凄凄复凄凄，嫁娶不须啼。愿得一心人，白头不相离。竹竿何袅袅，鱼尾何簌簌。男儿重义气，何用钱刀为。

### ◎怨歌行

新裂齐纨素，鲜洁如霜雪。裁为合欢扇，团团似明月。出入君怀袖，动摇微风发。常恐秋节至，凉飙夺炎热。弃捐篋笥中，恩道中情绝。

### ◎悲歌

悲歌可以当泣，远望可以当归。思念故乡，郁郁累累。欲归家无人，欲渡河无船。心思不能言，肠中车轮转。

### ◎古歌

秋风萧萧愁杀人，出亦愁，入亦愁。座中何人，谁不怀忧？令我白头。  
胡地多飚风，树木何修修。离家日趋远，衣带日趋缓。心思不能言，肠中车轮转。

### ◎刺巴郡守诗

狗吠何喧喧，有吏来在门。披衣出门应，府记欲得钱。语穷乞请期，吏怒反见尤。旋步顾家中，家中无可为。思往从邻贷，邻人言已匮。钱钱何难得，令我独憔悴。

### ◎后汉桓灵时谣

举秀才，不知书。察孝廉，父别居。寒素清白浊如泥，高第良将怯如鸡。

### ◎羽林郎

昔有霍家奴，姓冯名子都。依倚将军势，调笑酒家胡。胡姬年十五，春日独当垆。长裾连理带，广袖合欢襦。头上蓝田玉，耳后大秦珠。两鬟何窈窕，一世良所无。一鬟五百万，两鬟千万余。不意金吾子，娉婷过我庐。银鞍何煜爚，翠盖空踟蹰。就我求清酒，丝绳提玉壶。就我求珍肴，金盘脍鲤鱼。贻我青铜镜，结我红罗裾。不惜红罗裂，何论轻贱躯。男儿爱后妇，女子重前夫。人生有新故，贵贱不相逾。多谢金吾子，私爱徒区区。

◎董娇饶

洛阳城东路，桃李生路旁。花花自相对，叶叶自相当。春风东北起，花叶正低昂。不知谁家子，提笼行采桑。纤手折其枝，花落何飘飏。请谢彼姝子，何为见损伤。高秋八九月，白露变为霜。终年会飘堕，安得久馨香。秋时自零落，春月复芬芳。何如盛年去，欢爱永相忘。吾欲竟此曲，此曲愁人肠。归来酌美酒，挟瑟上高堂。

◎古八变歌

北风初秋至，吹我章华台。浮云多暮色，似从崦嵫来。枯桑鸣中林，络纬响空阶。翩翩飞蓬征，怆怆游子怀。故乡不可见，长望始此回。

◎并州歌

士为将军何可羞，六月重茵披豹裘，不识寒暑断他头。雄儿田兰为报仇，中夜斩首谢并州。

◎巴东三峡歌

巴东三峡巫峡长，猿鸣三声泪沾裳。巴东三峡猿鸣悲，猿鸣三声泪沾衣。

◎日出入

日出入安穷，时世与人不同。故春非我春，夏非我夏，秋非我秋，冬非我冬。泊如四海之地，便观是邪为何。吾知所乐，独乐六龙，六龙之调，使我心若。訾黄其何不徕下。

◎薤露

薤上露，何易晞。露晞明朝更复落，人死一去何时归。

◎蒿里

蒿里谁家地，聚敛魂魄无闲愚。鬼伯一何相催促，人命不得稍踟蹰。

◎乌生

乌生八九子，端坐秦氏桂树间。惜我，秦氏家有游遨荡子，工用睢阳强，苏合弹。左手持强弹两丸，出入乌东西。惜我，一丸即发中乌身，乌死魂魄飞扬上天。阿母生乌子时，乃在南山岩石间。惜我，人民安知乌子处，蹊径窈窕安从通。白鹿乃在上林西苑中，上林尚复得白鹿脯。惜我，黄鹄摩天极高飞，后宫尚复得烹煮之。鲤鱼乃在洛水深渊中，钓钩尚得鲤鱼口。惜我，人民生各有各有寿命，死生何须复道前后。

◎上陵

上陵何美美，下津风以寒。问客从何来，言从水中央。桂树为君船，青丝为君竿。木兰为君棹，黄金错其间。沧海之雀赤翅鸿，白雁随。山林乍开乍合，曾不知日月明。醴泉之水，光泽何蔚蔚。芝为车，龙为马。览遨游，四海外。甘露初二年，芝生铜池中。仙人下来饮，延寿千万岁。

◎善哉行

来日大难，口燥唇干。今日相乐，皆当喜欢。经历名山，芝草翩翩。仙人王乔，奉药一丸。自惜袖短，内手知寒。惭无灵辄，以报赵宣。月没参横，北斗阑干。亲交在门，

饥不及餐。欢日尚少，戚日苦多。以何忘忧，弹箏酒歌。淮南八公，要道不烦。参驾六龙，游戏云端。

◎怨诗行

天德悠且长，人命一何促。百年未几时，奄若风吹烛。嘉宾难再遇，人命不可赎。齐度游四方，各系太山录。人间乐未央，忽然归东岳。当须荡中情，游心态所欲。

## ► 南朝乐府

### ◎子夜歌其三

宿昔不梳头，丝发披两肩。婉伸郎膝上，何处不可怜。

### ◎子夜歌其七

始欲识郎时，两心望如一。理丝入残机，何悟不成匹。

### ◎子夜歌其九

今日已欢别，合会在何时。明灯照空局，悠然未有期。

### ◎子夜歌其十三

揽枕北窗卧，郎来就侬嬉。小喜多唐突，相怜能几时。

### ◎子夜歌其十八

常虑有貳意，欢今果不齐。枯鱼就浊水，长与清流乖。

### ◎子夜歌其廿四

揽裙未结带，约眉出前窗。罗裳易飘飏，小开骂春风。

### ◎子夜歌其廿八

夜长不得眠，转侧听更鼓。无故欢相逢，使侬肝肠苦。

### ◎子夜歌其卅三

夜长不得眠，明月何灼灼。想闻欢唤声，虚应空中诺。

### ◎子夜歌其卅五

我念欢的的，子行由豫情。雾露隐芙蓉，见莲不分明。

### ◎子夜歌其卅六

侬作北辰星，千年无转移。欢行白日心，朝东暮还西。

### ◎子夜四时歌·春歌 其三

光风流月初，新林锦花舒。情人戏春月，窈窕曳罗裾。

### ◎子夜四时歌·春歌 其五

碧楼冥初月，罗绮垂新风。含春未及歌，桂酒发清容。

### ◎子夜四时歌·春歌 其六

杜鹃竹里鸣，梅花落满道。燕女游春月，罗裳曳芳草。

### ◎子夜四时歌·春歌 其十

春林花多媚，春鸟意多哀。春风复多情，吹我罗裳开。

◎子夜四时歌·夏歌 其一

高堂不作壁，招取四面风。吹欢罗裳开，动侬含笑容。

◎子夜四时歌·夏歌 其七

田蚕事已毕，思妇犹苦身。当暑理絺服，持寄与行人。

◎子夜四时歌·夏歌 其八

照登凉台上，昔宿兰池里。乘月采芙蓉，夜夜得莲子。

◎子夜四时歌·秋歌 其十六

白露朝夕生，秋风凄长夜。忆郎须寒服，乘月捣白素。

◎子夜四时歌·秋歌 其十九

秋夜入窗里，罗帐起飘飏。仰头看明月，寄情千里光。

◎子夜四时歌·冬歌 其一

渊冰厚三尺，素雪覆千里。我心如松柏，君情复何似。

◎子夜四时歌·冬歌 其十七

寒云浮天凝，积雪冰川波。连山结玉岩，修庭振琼柯。

◎团扇郎歌其二

青青林中竹，可作白团扇。动摇郎玉手，因风托方便。

◎上声歌其六

新衫绣两端，迢着罗裙里。行步动微尘，罗裙随风起。

◎丁督户歌其四

督户出征时，侬亦恶闻许。愿作石尤风，四面断行旅。

◎丁督户歌其五

闻欢北征去，相送直渚浦。只有泪可出，无复情可吐。

◎懊侬歌其三

江陵去扬州，三千三百里。已行一千三，所有二千在。

◎懊侬歌其十

月落天欲曙，能得几时眠。凄凄下床去，侬病不能言。

◎华山畿

华山畿，华山畿，君既为侬死，独生为谁施？欢若见怜时，棺木为侬开。

◎读曲歌其十六

折杨柳。百鸟园林啼。道欢不离口。

◎读曲歌其廿一

逋发不可料，憔悴为谁睹。欲知相忆时，但看裙带缓几许。

◎读曲歌其廿九

奈何许。石阙生口中。衔碑不得语。

◎神弦歌·其六 青溪小姑曲

开门白水，侧近桥梁。小姑所居，独处无郎。

◎青溪小姑歌其一

日暮风吹，叶落依枝。丹心寸意，愁君未知。

◎石城乐

布帆百馀幅，环环在江津。执手双泪落，何时见欢还。

◎乌夜啼其四

可怜乌白鸟，强言知天曙。无故三更啼，欢子冒暗去。

◎莫愁乐其二

闻欢下扬州，相送楚山头。探手抱腰看，江水断不流。

◎三洲歌其一

送欢板桥湾，相待三山头。遥见千幅帆，知是逐风流。

◎作蚕丝其二

春蚕不应老，昼夜常怀丝。何惜微躯尽，缠绵自有时。

◎杨叛儿

暂出白门前，杨柳可藏乌。欢作沈水香，侬作博山炉。

◎长干曲

逆浪故相邀，菱舟不怕遥。妾家扬子住，便弄广陵潮。

◎巴东三峡歌

巴东三峡巫峡长，猿鸣三声泪沾裳。巴东三峡猿鸣悲，猿鸣三声泪沾衣。

◎三峡谣

朝发黄牛，暮宿黄牛。三朝三暮，黄牛如故。

注：《水经注》曰：峡中有滩名曰黄牛滩。南岸重岭叠起。最外高崖间。有色。如人负刀牵牛。人黑牛黄。成就分明。既人迹所绝。莫得究焉。此岩既高。加江湍纡回。虽途径信宿。犹望见此物。故行者谣云云。言水路行深。回望如一矣。

◎西洲曲

忆梅下西洲，折梅寄江北。单衫杏子红，双鬓鸦雏色。西洲在何处，两桨桥头渡。日暮伯劳飞，风吹乌桕树。树下即门前，门中露翠钿。开门郎不至，出门采红莲。采莲南塘秋，莲花过人头。低头弄莲子，莲子清如水。置莲怀袖中，莲心彻底红。忆郎郎不至，仰头望飞鸿。鸿飞满西洲，望郎上青楼。楼高望不见，尽日栏干头。栏干十二曲，垂手明如玉。卷帘天自高，海水摇空绿。海水梦悠悠，君愁我亦愁。南风知我意，吹梦到西洲。

◎东飞伯劳歌

东飞伯劳西飞燕，黄姑织女时相见。谁家女儿对门居，开颜发艳照里闾。南窗北牖桂月光，罗帷绮帐脂粉香。女儿年几十五六，窈窕无双颜如玉。三春已暮花从风，至留可怜谁与同。

◎苏小小歌

我乘油壁车，郎乘青骢马。何处结同心，西陵松柏下。

## ► 北朝乐府

### ◎琅琊王歌辞其一

新买五尺刀，悬着中梁柱。一日三摩挲，剧于十五女。

### ◎紫骝马歌辞其二

高山头树，风吹叶落去。一去数千里，何当还故处。

### ◎紫骝马歌辞其三

十五从军征，八十始得归。道逢乡里人，家中有阿谁。遥看是君家，松柏冢累累。兔从狗窦入，雉从梁上飞。中庭生旅谷，井上生旅葵。舂谷持作饭，采葵持作羹。羹饭一时熟，不知贻阿谁。出门东向看，泪落沾我衣。

### ◎折杨柳歌辞其一

上马不捉鞭，反折杨柳枝。蹀座吹长笛，愁杀行客儿。

### ◎折杨柳歌辞其二

腹中愁不乐，愿作郎马鞭。出入擐郎臂，蹀座郎膝边。

### ◎折杨柳歌辞其四

遥看孟津河，杨柳郁婆娑。我是虏家儿，不解汉儿歌。

### ◎折杨柳歌辞其五

健儿须快马，快马须健儿。蹴跋黄尘下，然后别雄雌。

### ◎陇头歌辞其一

陇头流水，流离山下，念吾一身，飘然旷野。

### ◎陇头歌辞其三

陇头流水，鸣声幽咽。遥望秦川，心肝断绝。

### ◎李波小妹歌

李波小妹字雍容，褰裳逐马如卷蓬。左射右射必叠双。妇女尚如此，男子安可逢。

### ◎敕勒歌

敕勒川，阴山下。天似穹庐，笼盖四野。天苍苍，野茫茫，风吹草低见牛羊。

## ► 其他乐府诗

### ◎丁令威歌

有鸟有鸟丁令威，去家千年今始归。城郭如故人民非，何不学仙冢累累。

### ◎南风谣

南风起，吹白沙。遥望鲁国何嵯峨，千岁骷髏生齿牙。



◎隋炀帝时挽舟者歌

我兄征辽东，饿死青山下。今我挽龙舟，又困隋堤道。方今天下饥，路粮无些小。前去三千程，此身安可保。寒骨枕荒沙，幽魂泣烟草。悲损门内妻，望断吾家老。安得义男儿，焚此无主尸。引其孤魂回，负其白骨归。

